

BM tetap bahasa pengantar di sekolah
Utusan Online
October 01, 2011
Oleh WANDA IDRIS

KUALA LUMPUR 30 Sept. – Timbalan Perdana Menteri, Tan Sri Muhyiddin Yassin menegaskan, kerajaan tidak akan mewujudkan sekolah aliran bahasa Inggeris kecuali berlaku perubahan pada Akta Pendidikan dan Dasar Pendidikan Negara.

Menurut beliau, akta dan dasar tersebut secara jelas menyebut bahawa bahasa pengantar di sekolah kebangsaan adalah bahasa Melayu atau bahasa Malaysia.

Justeru katanya, sebagai Menteri Pelajaran, adalah menjadi tanggungjawab beliau melaksanakan sebarang dasar berasaskan pada akta dan dasar tersebut biarpun terdapat permintaan daripada pihak tertentu khususnya ibu bapa untuk mewujudkan sekolah aliran Inggeris.

“Tidak mungkin akan wujud sekolah aliran bahasa Inggeris kecuali ada perubahan dasar dan akta. Selagi akta tidak berubah, dasar itu kekal, maka tidak akan wujud sekolah aliran Inggeris.

“Swasta lain ceritalah. Swasta, bahasa Perancis pun boleh, apa pun boleh.

“Tetapi dalam aliran kebangsaan, ia adalah bahasa Melayu atau bahasa Malaysia tetapi untuk sekolah jenis kebangsaan, kita setuju bahasa Cina dan Tamil,” katanya pada sidang akhbar selepas mengadakan lawatan kerja ke Universiti Putra Malaysia (UPM), dekat sini hari ini.

Terdahulu ketika sesi dialog bersama mahasiswa, Muhyiddin sekali lagi menegaskan mengenai keputusan memansuhkan Pengajaran dan Pembelajaran Sains dan Matematik dalam Bahasa Inggeris (PPSMI) adalah untuk memperkasakan Bahasa Melayu dan memperkukuhkan Bahasa Inggeris (MBMMBI).

Ini kerana menurutnya, pelaksanaan PPSMI dalam tempoh enam tahun menunjukkan kesan negatif apabila sebahagian besar rakyat tidak memahami bahasa selain bahasa ibundanya.

Malah adalah penting kata beliau, untuk memberikan pendidikan di peringkat awal kepada kanak-kanak menggunakan bahasa yang mereka mudah fahami.

Perkara itu turut dipersetujui pada mesyuarat lembaga eksekutif Pertubuhan Pendidikan, Saintifik dan Kebudayaan Pertubuhan Bangsa Bersatu (UNESCO) yang dihadapinya di Paris awal minggu ini.

“Sebab itu orang Cina nak sekolah Cina, orang India nak sekolah Tamil dan orang Melayu nak bahasa Melayu di sekolah kebangsaan kerana kita iktiraf dan di Sabah dan Sarawak, kita sudah mengizinkan mereka menggunakan bahasa ibunda Iban, Kadazan kerana itu yang mudah difahami. Pokoknya ilmu kalau kita ajar dengan bahasa yang susah difahami, sukar,” katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1001&pub=Utusan_Malaysia&sec=Dalam_Negeri&pg=dn_02.htm